

Fatahmand Zindagi



Rūhul-quds kī Madad se

fatahmand zindagī. rūhul-quds kā kām

Victorious Living. The Work of the Holy Spirit

by Bakhtullah

[Ao, Khud Dekh Lo 28]

(Urdu—Roman script)

© 2024 www.chashmamedia.org

published and printed by

Good Word, New Delhi

The title cover is contains OpenClipart-Vectors
<https://pixabay.com/vectors/pigeon-dove-peace-dove-148038/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Rūh se Merī Qurbat Pāo	2
Rūh se Mere Pyār kā Bandhan Pāo	8
Rūh se Merā Ṭhappā Pāo	12
Rūh se Merī Salāmatī Pāo	14
Injīl, Yūhannā 14:15-31	16

Har insān kāmyāb honā chāhtā hai. Har ek apne ghar wāloñ ke lie izzat aur sukh kā bāis honā chāhtā hai. Ham sab fathmand zindagī guzārnā chāhte haiñ—aisī zindagī jo har challenge kā sāmna kar pāe, har rukāwaṭ par ḡhālib āe.

► *Lekin ham kis tarah fathmand rah sakte haiñ?*

Īsā Masīh ne iskā sāf jawāb diyā. Īsā Masīh jāntā thā ki thoṛī der bād mujhe is duniyā se kūch kar jānā hai. Islie zarūrī hai ki apne shāgirdoñ ko kuchh hidāyāt dūñ. Ab us ne ek naī bāt chheṛī. Ek aisī bāt jo shāgird us waqt nahīñ samajh sakte the. Bāt kyā thī? Rūhul-quds.

► *Us ne Rūhul-quds kī bāt kyon chheṛī?*

Wuh shāgirdoñ ko is bāt ke lie taiyār karnā chāhtā thā ki mere jī uṭhne ke bād Rūhul-quds nāzil hogā.

- *Lekin Rūhul-quds ke āne kā kyā maqsad thā? Use pāne se hamēn kyā hāsil hotā hai?*

Iskā muḳhtasar jawāb yih hai ki us se hamēn fathmand zindagī hāsil hogī. Fathmand zindagī guzārne meñ Rūhul-quds hamārī madad karegā.

- *Rūhul-quds fathmand zindagī guzārne meñ hamārī madad kis tarah karegā?*

Is sawāl kā jawāb Īsā Masīh denā chāhtā thā. Pahlī bāt,

Rūh se Merī Qurbat Pāo

Īsā Masīh ne farmāyā,

Agar tum mujhe pyār karte ho to mere ahkām ke mutābiq zindagī guzāroge. Aur main Bāp se guzārish karūngā to wuh tum ko ek aur madadgār degā jo abad tak tumhāre sāth rahegā yānī sachchāi kā Rūh, jise duniyā pā nahīn saktī, kyonki wuh na to use dekhtī na jāntī hai. Lekin tum use jānte

ho, kyonki wuh tumhare saath rahta hai aur aindaa tumhare andar rahega.
(Yuhanna 14:15-17)

► *Kaun Masih ke ahkam ke mutabiq zindagi guzarega?*

Wuh jo use pyar kartaa hai. Masih ke piche ho lene ka yeh matlab nahin ki ham use apna vote den. Use partibazi se nafrat hai. Wuh ek hi bat chahta hai. Yeh ki ham use pyar karen. Kyonki use pyar karenge to khud bakhud us ke ahkam ke mutabiq zindagi guzarenge.

Ajkal solar light am ho gai hai. Dhup mein uski battery, solar panel se charge hone lagti hai. Andhera shuru hua to light on ho jati hai. Matlab hai jo bijli solar panel se paida hui hai wuh light ke lie istemal hoti hai.

Ham bhi us jaisi light hain. Hamara bas ek hi kam hai, yeh ki Isa Masih ki muhabbat-bhari dhup senken. Uski muhabbat jazb kar lene se hamari muhabbat bharak uthti hai aur ham solar panel ki light ki tarah duniya ke andhere mein uski raushni

phailāne lagte haiñ. Yahī Īsā Masīh kā matlab hai: Jab ham use pyār karte haiñ to uskī muhabbat-bharī dhūp señkte haiñ. Tab hī ham us ke ahkām par chal pāenge.

► *Lekin Īsā Masīh ko Bāp ke pās jānā thā. Us ke bād shāgird kis tarah uskī dhūp señk sakte the?*

Ḳhudā Bāp ek aur madadgār degā.

► *Pahlā madadgār kaun thā?*

Pahlā madadgār Īsā Masīh thā jo ab kūch kar jāne wālā thā. Isliē Bāp ek aur madadgār bhejegā.

► *Yih madadgār kaun hai?*

Sachchāi kā Rūh yānī Rūhul-quds. Wuhī Masīh ke jī uṭhne ke bād shāgirdoñ par nāzil hogā. Us waqt se wuh har sachche imāndār kī madad karegā. Agar Bāp sūraj hai to Farzand sūraj kī raushnī aur Rūhul-quds sūraj kī garmī hai.

► *Kyā duniyā Rūhul-quds ko pā saktī hai?*

Nahīñ.

► *Kaun Rūhul-quds ko pā saktā hai?*

Sirf wuh jo Īsā Masīh par īmān rakhtā hai.

- *Iskā kyā matlab hai ki ‘Tum madadgār ko jānte ho, kyonki wuh tumhāre sāth rahtā hai?’ Yih madadgār hāl hī meñ kis tarah shāgirdon ke sāth rahtā thā? Us waqt to Rūhul-quds nāzil nahīn huā thā.*

Hāl meñ Īsā Masīh khud un kā madadgār thā. Wuhī un ke sāth rahtā thā. Shāgird use aur us ke kām apnī ānkhon se dekh sakte the, use apne hāthon se chhū sakte the. Yon shāgird use jānte the, aur wuh un kī madad kartā rahtā thā.

Īsā Masīh yahī kuchh kahnā chāhtā thā: Is waqt main hī tumhārā madadgār hūñ jis meñ Rūhul-quds bastā hai. Lekin āindā Rūhul-quds nāzil hokar tumhāre hī andar rahegā. Us meñ main khud tumhāre dilon meñ maujūd hūngā. Islie ghabrāne kī zarūrat nahīn hai—jo muhabbat aur sahāytā tumheñ is waqt hāsil hai wuh āindā bhī hāsil hogī.

Ab ham uskī aglī bāt bhī samajh sakte haiñ:

Maiñ tum ko yatim chhoṛkar nahin jāūngā balki tumhare pās wāpas āūngā. Thoṛī der ke bād duniyā mujhe nahin dekhegī, lekin tum mujhe dekhte rahoge. Chūnki main zindā hūn islie tum bhī zindā rahoge. (Yūhannā 14:18-19)

► *Īsā Masīh kis tarah wāpas āegā?*

Jī uṭhne ke bād wuh kuchh dinon ke lie apne shāgirdon par zāhir hogā. Phir wuh uṭhā liyā jāegā aur Rūhul-quds nāzil hogā. Rūhul-quds ke nāzil hone par wuh bhī Rūhul-quds mein hāzir hogā. Yahān Masīh is par zor de rahā hai ki wuh Rūhul-quds mein hāzir hogā.

► *Us waqt duniyā use nahin dekhegī lekin imāndār use dekhte raheṅge. Wuh kis tarah use dekhte raheṅge?*

Wuh Rūhul-quds ke zariye use dekhte raheṅge. Rūhul-quds ke zariye wuh un ke dilon mein maujūd hogā. Aur chūnki wuh zindā hai islie

wuh bhī zindā raheᅅge. Jis zindagī se wuh maut par ᅅhālīb āyā wuhī zindagī unheᅅn hāsīl hogī. Rūhul-quᅅds ke āne par īmāᅅdār ko Masīh kī yih qurbat ekdam māᅅlūm ho jāegī. Īsā Masīh ne farmāyā,

Jab wuh dīn āegā to tum jān loge kī main apne Bāp meᅅn hūᅅn, tum mujh meᅅn ho aur main tum meᅅn.

(Yūhannā 14:20)

Kitnī gahrī qurbat! Masīh Bāp meᅅn hai aur wuh ham meᅅn bhī hai. Yahī wajah hai kī ham ᅅᅅhudā ke ghar wāle haiᅅn. Isī lie ham us ke huzūr rah sakte haiᅅn. Aur yih gahrī qurbat Rūhul-quᅅds se paidā ho gaī hai. Usī ke wasīle se yih rishtā aur rifāqat hameshā tar-o-tāzā rahtī hai.

Agar mobile kā signal na ho to wuh be-kār hai. Isī tarah hamārī ᅅᅅhudā se rifāqat Rūhul-quᅅds ke wasīle se paidā hotī hai. Wuhī mobile kā signal hai. Usī se ham har waqt ᅅᅅhudā ke huzūr rah sakte

haiñ, dukh-sukh kī har bāt us ke sāmne rakh sakte haiñ.

Īsā Masīh Rūhul-quds ke bāre meñ ek aur bāt bhī kahnā chāhtā hai. Yih ki

Rūh se Mere Pyār kā Bandhan Pāo

Īsā Masīh ne farmāyā,

Jis ke pās mere ahkām haiñ aur jo un ke mutābiq zindagī guzārtā hai, wuhī mujhe pyār kartā hai. Aur jo mujhe pyār kartā hai use merā Bāp pyār karegā. Maiñ bhī use pyār karūngā aur apne āpko us par zāhir karūngā.

(Yūhannā 14:21)

► *Jo Īsā Masīh ke ahkām par chaltā hai wuh kyā kartā hai?*

Wuh Īsā Masīh ko pyār kartā hai.

► *Jo Īsā Masīh ko pyār kartā hai use kaun pyār kartā hai?*

Ḳhudā Bāp aur Īsā Masīh.

Yon ek bandhan hai jo imāndār ko Ḳhudā Bāp aur Ḳhudā Farzand ke sāth joṛ detā hai.

► *Bandhan kyā hai?*

Pyār—wuh pyār jis se Rūhul-quds imāndār ko Ḳhudā ke sāth jakṛe rakhtā hai.

► *Jo Masīh ko pyār kartā hai us ke sāth Īsā Masīh kyā karegā?*

Wuh apne āpko us par zāhir karegā.

► *Apne āpko pyār karne wāle par zāhir karne se kyā farq partā hai?*

Apne āpko pyār karne wāle par zāhir karne se us ke sāth rifāqat baṛhtī jāegī. Jitne ham use pyār kareṅge utnā hī wuh ham par zāhir ho jāegā, utnā hī hamārī us ke sāth rifāqat baṛh jāegī.

Ab ek shāgird ne pūchhā, “Ḳhudāwand, kyā wajah hai ki āp apne āpko sirf ham par zāhir kareṅge aur duniyā par nahīn?”

► *Shāgird ne yih kyon pūchhā?*

Īsā Masīh farmā chukā thā ki shāgirdoñ aur duniyā kā koī sambandh nahīñ hai. Duniyā Rūhul-quds ko pā hī nahīñ saktī. Ab us ne farmāyā thā ki main apne āpko sirf us par zāhir karūngā jo mujhe pyār kartā hai. Lekin shāgird to abhī tak samajhte the ki wuh thoṛī der bād Yarūshalam meñ bādshāh bankar sab par zāhir ho jāegā. Islie shāgird kā yih sawāl ki āp apne āpko duniyā par zāhir kyoñ nahīñ kareñge? Āp kyoñ sirf ham par zāhir ho jāeñge? Īsā Masīh ne jawāb diyā,

Agar koī mujhe pyār kare to wuh mere kalām ke mutābiq zindagī guzāregā. Merā Bāp aise shaḳhs ko pyār karegā aur ham us ke pās ākar us ke sāth sukūnat kareñge. (Yūhannā 14:23)

Ek hī shart hai ki Īsā Masīh kisī par zāhir ho jāe.

► *Shart kyā hai?*

Yih ki wuh Īsā Masīh ko pyār kare.

► *Masīh ko pyār karne se kyā hogā?*

Wuh us ke kalām ke mutābiq zindagī guzāregā.

► *Tab kyā hogā?*

Phir Ḳhudā Bāp use pyār karegā aur wuh apne Farzand samet us ke pās ākar us ke sāth sukūnat karegā. Dūsre alfāz meñ wuh us meñ apnā ghar banā leñge. Kitnī azīm bāt!

Lekin duniyā kabhī Īsā Masīh se muhabbat nahīn kartī, na uskī bātoñ ke mutābiq zindagī guzārtī hai. Islie Masīh kabhī duniyā par zāhir nahīn ho saktā. Kisī par zāhir honā us se gahrī rifāqat rakhne ke barābar hai, wuh rifāqat jo sirf ghar wāloñ meñ hotī hai.

Yih bāt ham par bhī sādiq ātī hai. Īsā Masīh duniyā par zāhir nahīn hotā. Is se koī farq nahīn paṛtā ki us ke nām meñ baṛī baṛī ibādatgāheñ ban gaī haiñ, ki logoñ ne uskā nām lekar qatl-o-ghārat machāī hai, uskā nām lekar daulat aur shān-o-shaukat hāsīl kī hai. Īsā Masīh duniyā kī dhūmdhām par zāhir nahīn hotā.

► *Wuh kyon nahīn duniyā par zāhir hotā?*

Kyonki duniyā use pyār nahīn kartī, us ke ahkām par nahīn chaltī. Use Rūhul-quds hāsīl nahīn hai islie Ḳhudā se rifāqat ho nahīn saktī. Hāñ, adālat ke din wuh duniyā par bhī zāhir ho jāegā, lekin rifāqat rakhne ke lie nahīn balki uskī adālat karne ke lie. Tab Īsā Masīh ne Rūhul-quds ke bāre meñ ek tīsri bāt batāī. Yih ki

Rūh se Merā Ṭhappā Pāo

Īsā Masīh ne farmāyā,

Yih sab kuchh mainne tumhare sāth rahte hue tum ko batāyā hai. Lekin bād meñ Rūhul-quds, jise Bāp mere nām se bhejegā tum ko sab kuchh sikhāegā. Yih madadgār tum ko har bāt kī yād dilāegā jo mainne tum ko batāī hai. (Yūhannā 14:25-26)

Īsā Masīh ke chale jāne ke bād Ḳhudā Bāp Rūhul-quds ko bhejegā.

► *Yih madadgār kyā karegā?*

Wuh sab kuchh sikhāegā. Yānī wuh Masīh kī har bāt kī yād dilāegā.

► *Yih karne kā kyā maqsad hai?*

Maqsad yih hai ki wuh ham par Masīh kā ṭhappā lagāe.

► *Ṭhappā lagāne kā kyā matlab hai?*

Kāghaz par ṭhappā lagāne kā matlab yih hai ki mohr lagāyā jātā hai. Ṭhappā lakaṛī kā wuh ṭukṛā bhī hotā hai jis par ubhre hue bel-būṭe bane rahte haiñ aur jis par log rang potkar un bel-būṭon ko kapṛe par chhāpte haiñ. Ṭhappe kā matlab sāñchā bhī hotā hai jis meñ miṭṭī yā koī aur chīz ḍhalkar sāñche kī shakl apnātī hai. Jab ham Rūhul-quds pāte haiñ to Masīh kā ṭhappā ham par lag jātā hai.

► *Masīh kā ṭhappā lagne kā kyā matlab hai?*

- Rūh ham par Masīh kā mohr lagātā hai. Mohr lagāne se yih bāt pakkī ho jātī hai ki ham Masīh ke haiñ.

- Rūh ham par Masīh kā azīm design yoñ chhāptā hai, jis tarah safed kapṛe par rangdār ṭhappā lagtā hai.
- Rūh hameñ Masīh ke sāñche meñ ḍhāltā hai. Tab ham Masīh kī sūrat meñ badalte jāte haiñ. Uskī muhabbat, uskī halīmī, hāñ uskā pūrā wujūd hamāre andar zor pakartā jātā hai.

Phir Īsā Masīh ne ek ākhirī hidāyat dī. Yih ki

Rūh se Merī Salāmatī Pāo

Īsā Masīh ne farmāyā,

Main tumhāre pās salāmatī chhoṛe jātā hūñ, apnī hī salāmatī tum ko de detā hūñ. Aur main ise yoñ nahīñ detā jis tarah duniyā detī hai. Tumhārā dil na ghabrāe aur na ḍare.

(Yūhannā 14:27)

- ▶ *Īsā Masīh kyā chhoṛe jātā hai?*
Salāmatī.
- ▶ *Yih kis kī salāmatī hai?*
Yih uskī apnī salāmatī hai.

► *Kyā duniyā yih salāmatī de saktī hai?*

Nahīn.

► *Kyon nahīn?*

Īsā Masīh ne apnī salībī maut se wuh chīz miṭā dī jo hamēn Ḳhudā se judā kartī hai yānī hamāre gunāhoñ ko. Is se ham jo īmān lāe haiñ Ḳhudā ke ghar wāle ban gae haiñ. Aur yih salāmatī hamāre diloñ meñ rahtī hai.

► *Yih salāmatī kis tarah hamāre diloñ meñ rahtī hai?*

Rūhul-quds ke zariye. Wuhī hamāre diloñ meñ yih salāmatī basā detā hai. Isī wajah se ghabrāne kī zarūrat nahīn hai. Īsā Masīh to chalā gayā lekin Rūhul-quds ke zariye uskī salāmatī hamāre sāth rahtī hai.

Duniyā yih salāmatī nahīn dilā saktī. Wuh to daulat, shān-o-shaukat aur aish-o-ishrat de saktī hai. Lekin wuh yih salāmatī nahīn de saktī.

► *Īsā Masīh yih sab kuchh kyon shāgirdoñ ko batā rahā thā?*

Us ne farmāyā,

Maiñne tum ko pahle se batā diyā hai, is se peshtar ki yih ho, tāki jab pesh āe to tum īmān lāo. (Yūhannā 14:29)

Shāgirdoñ ko yih jānane kī zarūrat thī ki Īsā Masīh kī dukh-bharī rāh Ḳhudā ke mansūbe ke mutābiq thā. Us waqt wuh nahīn samajh sakte the ki yih madadgār kyā hai aur uskā hamāre sāth kyā tālluq hai. Lekin bād meñ Rūhul-quds un par nāzil huā. Tab us ne unheñ Masīh kī qurbat aur pyār kā bandhan dilāyā. Us ne un par Masīh kā ṭhappā lagā diyā, aur unheñ Ḳhudā kī gahrī salāmatī hāsil huī.

► *Kyā āpne Rūhul-quds pā liyā hai?*

Injil, Yūhannā 14:15-31

Agar tum mujhe pyār karte ho to mere ahkām ke mutābiq zindagī guzāroge. Aur main Bāp se guzārish karūngā to wuh tum ko ek aur madadgār degā jo abad tak tumhāre sāth rahegā yānī sachchāi kā Rūh, jise duniyā pā

nahīn saktī, kyoṅki wuh na to use dekhtī na jāntī hai. Lekin tum use jānte ho, kyoṅki wuh tumhāre sāth rahtā hai aur āindā tumhāre andar rahegā.

Maiṅ tum ko yatīm chhoṅkar nahīn jāūngā balki tumhāre pās wāpas āūngā. Thoṛī der ke bād duniyā mujhe nahīn dekhegī, lekin tum mujhe dekhte rahoge. Chūnki maiṅ zindā hūn islie tum bhī zindā rahoge. Jab wuh din āegā to tum jān loge ki maiṅ apne Bāp meṅ hūn, tum mujh meṅ ho aur maiṅ tum meṅ.

Jis ke pās mere ahkām haiṅ aur jo un ke mutābiq zindagī guzārtā hai, wuhī mujhe pyār kartā hai. Aur jo mujhe pyār kartā hai use merā Bāp pyār karegā. Maiṅ bhī use pyār karūngā aur apne āpko us par zāhir karūngā.” Yahūdāh (Yahūdāh Iskariyotī nahīn) ne pūchhā, “Ḳhudāwand, kyā wajah hai ki āp apne āpko sirf ham par zāhir karenge aur duniyā par nahīn?”

Īsā ne jawāb diyā, “Agar koī mujhe pyār kare to wuh mere kalām ke mutābiq zindagī guzāregā. Merā Bāp aise shaḵhs ko pyār karegā aur ham us ke pās ākar us ke sāth sukūnat kareṅge. Jo mujh se muhabbat nahīn kartā wuh merī bātoñ ke mutābiq zindagī nahīn guzārtā. Aur jo kalām tum mujh se sunte ho wuh merā apnā kalām nahīn hai balki Bāp kā hai jis ne mujhe bhejā hai.

Yih sab kuchh mainne tumhāre sāth rahte hue tum ko batāyā hai. Lekin bād meñ Rūhul-quds, jise Bāp mere nām se bhejegā tum ko sab kuchh sikhāegā. Yih madadgār tum ko har bāt kī yād dilāegā jo mainne tum ko batāī hai.

Main tumhāre pās salāmatī chhoṛe jātā hūñ, apnī hī salāmatī tum ko de detā hūñ. Aur main ise yoñ nahīn detā jis tarah duniyā detī hai. Tumhārā dil na ghabrāe aur na ḍare. Tum ne mujh se sun liyā hai ki ‘Main jā rahā hūñ aur tumhāre pās wāpas āūṅgā.’ Agar tum mujh se

muhabbat rakhte to tum is bāt par ḡhush hote ki main Bāp ke pās jā rahā hūn, kyoṅki Bāp mujh se baṛā hai. Mainne tum ko pahle se batā diyā hai, is se peshtar ki yih ho, tāki jab pesh āe to tum īmān lāo. Ab se main tum se zyādā bāteṅ nahīn karūṅgā, kyoṅki is duniyā kā hukmrān ā rahā hai. Use mujh par koī qābū nahīn hai, lekin duniyā yih jān le ki main Bāp ko pyār kartā hūn aur wuhī kuchh kartā hūn jis kā hukm wuh mujhe detā hai. Ab uṭho, ham yahān se chaleṅ.